

En annrer lobt en anners Ding,
Ich will ämol von Kliösne g'sing;
Un weller hot en guten Mogen,
Der werd sich, gelä ich, zu mir schlogten.

Brengt ollen die Kartoffeln her!
Sie däffen gruß g'sei schont un schwer,
Un reibt se in die Schüssel z'samme,
So stenn die Kliös bald an der Flamme.

Viel Bröckle müßen innig g'sei,
Süst werd's ä Matsch un Kinnlesbrei;
Ich hör' im Hofen schon die Schnalzer,
Es hoppert wien ä Kirwewalzer.

Un wiste Kliös von wässe Mahl,
So söll's an söttne a nöt g'fahl;
Die ka ärst racht gekoch mei Madla,
Sie läfft as wien ä Spuln am Radla.

Un wos ze Mittog über bleit,
Dös sicht mer, wie mer's Abends schneidt:
Mit Flintenstee stärkt mer die Glieder,
Un legt sich gottzefrieden nieder.

Äsu ä Klos macht halt ä Freed,
Mer weiß necks merr von Angst un Leed;
Drüm loß ich annern öll ihr Prassen,
Un lob mer halt dös Frankenassen.

Anonym. Aus Tambach (Koburger Land)

DES LIED VO DER BAUERSCHÄRBET

Im Fäld de gätt ä Jöngle 'röm,
Das blait nert stänn on sitt sich nert öm,
Es setzt sich nirt, hat goar kä Ru,
On läfft o rennt ner ömmerzu,
Dröm häßt me's die Bauerschärbet.

Fri worsch noch dort, zont eß schu doe,
Es läfft sich wärzig blizwimmeligbloe,
Es sprängt, daß 's bänoch den Oadem verleüßt
On Schwääß genunk den Buckel 'na fleüßt,
Dröm häßt me's die Bauerschärbet.

Die Trapfe rammeln vo sänn Gesicht,
Bi Thaa vo den Gras in Morgelicht;
Es wescht se mit den Ärmel 'ra
On läßt vo sänn Spränge doch nert a,
Dröm häßt me's die Bauerschärbet.

Gätt's vern Wasser verbei des närrisch Dänk,
So hat's halt Duurscht on mög getränk,
Mit der hohle Haand greüft's dreimal'nei
On läfft dernach noch schneller verbei,
Dröm häßt me's die Bauerschärbet.

Es schüütelt die Beem ach onnerwäs
On melkt debei die Kuh on die Gäs;
Fri ropft's noch Gens, zont schiert's die Schaff,
On kom e Beßle sitt me's schlaff,
Dröm häßt me's die Bauerschärbet.

Erscht nachte, ackert's so gut me ner koo,
On heut holt's schu den Kleä devoo;
Morn lät's Kärtoffel in den Saand
On setzt des Kraut mit der annere Haand,
Dröm häßt me's die Bauerschärbet.

Erscht übernachtete soet's des Korn
On will's schu 'ra schneid übermorn,
Dezwesche meäht's die Wiese aus
On thutt dann ach die Rube 'raus,
Dröm häßt me's die Bauerschärbet.